

御選明臣奏議

卷十一
卷十二

御選明臣奏議卷十一

議行武舉疏

弘治十七年

劉大夏

臣惟武舉之設將以延攬英雄廣儲將帥招徠韜晦之士收拾跡弛之才蓋以古今治天下之具惟文武二道天之生才以供世用惟文武二藝凡國家求相于文求將于武亦惟文武二科我朝設文舉足以備一代之彝典而其網羅之周自閥閱以及草澤均得人以備任使其用武臣也甄別軍功之大小以爲陞擢之階級內或陟督府之崇班外或膺邊方之重寄世享簪纓家足餼

廩獎勵武臣作興士氣意甚善矣但求止于武弁一途
凡授鉞推轂非出于貴寵之子弟卽拔自行伍之粗材
近歲有保舉將才之例又但據其現有官職之人其間
往往徇名而不責實挽強引重者視爲勇敢談說縱橫
者目爲謀略及委以重兵臨以大敵僨事者多而成功
者少蓋因求將之意雖勞而選將之路太狹也宋臣范
仲淹有言議者不知取將之無術但云當今之無將今
日之弊殆亦坐此且天之賦人以才絀于文者或優于
武不以遠而嗇不以賤而限如穰苴生于寒微吳起困

于羈旅樂毅出于疎賤黥布雜于輿臺若當時非有知
識之人爲之汲引豈能自致通顯建功于世而垂稱于
後耶夫武以用將爲先亦猶文以求相爲先孫武曰將
者人之司命國家安危之主也司馬曰將不能設無以
應卒昔唐知求將之爲重視進士科而增置武舉遂得
郭子儀卒成再造之功宋知求將之爲重視制科而詳
定武舉卒能料元昊之背叛破智高之猖獗蓋異人傑
士咸奮興以赴功名之會此前代故事有足徵也宋臣
蘇洵言于仁宗曰文有制科武有武舉陛下欲得將相

于此乎取之十人之中豈無一二此名儒格言爲足徵也茲者適當武舉再開之時法制未備禮義未隆上未足以協旁求之心下不足以副登進之望宋臣富弼請置武舉嘗曰法度粗率未能致特起之士臣竊與之異世而同懷也蓋事旣當重則品式宜加詳備恩禮宜從優厚今欲依倣唐宋故事參酌會殿二試事例少加損益每遇文舉鄉試之年亦將武舉豫期行移兩京各省令其轉行曉諭如有究極韜畧精通武藝者或隱于山林或育于學校或羈于戎卒或係于仕籍許赴所在官

司投報果可取者禮送兵部會萃數目請于次年開科初較騎射二較步射三試策論優者列職論官以示崇異其非全材黜之以俟後舉此制酌定庶法式昭宣足以備彝憲禮遇崇重足以激人心凡海內智勇之士莫不仗劍而起各售其術期以効用于世是驅天下之英雄而入于吾之彀中陛下合羣策而用之何愾之不可敵何侮之不可禦伸威萬里將無不如吾意者又何必思借才于異代也哉 疏入帝從之

覆金洪陳邊務疏議 弘治十七年

劉大夏

臣等看得陝西巡按金洪所奏後開十事俱係邊方要務本官親歷其地奉敕閱實聞見必真擬合逐一對款議擬伏乞聖明裁處一嚴燒荒以安邊也查得每年秋深草水枯乾之時本部請敕各鎮守臣并獨守一方內外官員先行差人哨無敵情然後行令副參等官各照地方出境燒荒已有常行定例但將官實心奉行者少欲于燒荒畢日重復出境查驗勢恐難行今詳本官所奏之意則是套內敵情有無可以驗燒荒虛實合無通行各邊今後每年燒荒官軍回日巡撫務要盤檢有無

牲口帶來日後如有外夷在套或近邊住牧就遣夜不收哨探在何地方離邊遠近查與原報燒過里數若干就將原日領軍出境燒荒將官指實參奏拏問本處查有人入邊失事緣由依擬降謫一修城堡以固邊也查得近該延綏守臣奏稱本鎮寧夏至定邊營一帶地方衝要應行修築邊牆等因已經題行總制衙門公同守臣勘議具奏外今本官又奏前因大意在于選用巡山官員修理各該險阻事在彼處難以遙制合無備行總制秦紘公同二鎮守臣一并查勘備由具奏一揀將才以

鎮邊也看得本官閱視地方開奏各官賢否應當參酌所言處置但延寧一帶爲事將官近該本部奏稱敵衆過河要人隄備已經奉有欽依姑令記罪前去領兵隄備候敵情寧日照舊問結所舉王戟魏鎮藍海案候聽用外所據開奏馬隆姜漢亦各稱有將官器度宜當俟其後效傳釗張翼旣稱其怯敵圖利無才貪殘合無行令總制并各該巡撫再加詢訪的確候各官問結之日另行具奏定奪一放土軍以信邊也查得先爲急募土兵以禦敵人事招募過延寧二鎮土軍共二萬一千三

百七十六名編成隊伍關與軍器各隨衛所營堡食糧就令原招人員管習武藝情願常操者補作游兵之數其餘分作兩班每年十月起至開年三月止每班備禦三箇月該管官員敢有科擾及擅勾非時公私役使者參奏究治等因題奉聖旨是欽此欽遵通行去後續該彼處守臣奏稱各軍情願留操及將沿邊增設衛分就將各軍編發補伍行令勘處間今金洪親歷其地據告真情稱比先招募之濫近日拘留之苦供貼之難甚至願將原賞銀兩送官疎放中間難保其無捏作願留及

科擾役使之弊合無將金洪所言備行總制秦紘候邊情寧日選委二司能幹著實官員各赴二鎮將原招軍士逐一清審明白仍查照欽依事理除著實甘心願留補作游兵其餘俱責令里老及該管人員保領照例冬春輪班操備夏秋放免歸農遇有重大敵情一面行移巡撫巡按會同拘集一面奏聞拘操之日照例支糧中間查有死亡告相明白卽與開除願補者聽詭名捏報逃走者就拘原報之人正身及父兄弟頂當仍將審過實數并處置過緣由咨部知會若查有科擾等弊應

拏問者拏問應參奏者指實參奏一教騎射以禦邊也看得操練官軍騎射係是將官本等職業今金洪親歷其地比驗軍士如此不堪該管將官所幹何事巡撫因何扶同不言況事在人行兵難中制合無不必本部立法差官止將金洪所言通行各邊總兵今後務要嚴督副參等官用心設法教習騎射巡撫不時比驗將把總管隊等官量行賞罰若將官果有中間不肯嚴督操練虛應故事卽便具實奏聞御史按歷去處比驗軍士若果騎射不熟及詢訪將官止知培剋私役者指實具奏

本部將巡撫總兵一并參奏取自上裁一節工役以逸邊也查得先該寧夏守臣各奏稱勘議過本邊原有古渠三道東渠中渠現通水利可遏敵路惟山邊一渠內地方似爲敵境欲將舊渠挑成河塹以限戎馬多得地利以資邊儲本部議得工程浩大難便輕舉仍行各官會同巡按再行計議迄今三年未據奏報今本官奏稱所開之渠地高于水不能灌溉山口多石功亦難成並據寧夏久疲未蘇之人何以堪此合無備行總制秦紘移文該鎮守臣從長計議如果此渠難于施工徒勞無

益卽便停止咨報知會一用精銳以助邊也查得各邊遇有敵中走回人口審有的確鄉貫者送發寧家完聚免其雜差係現行事例今本官奏要將前項在敵年久走回之人俱令就被便所收入隊伍槩與糧賞是亦選用精銳用防邊鄙之意但此輩被擄日久自意骨枯草野不復與父母妻子面見幸而脫死生還情難一槩強留合無行移彼處鎮巡官員今後被擄走回審有鄉貫之人若果精銳情願在邊殺敵者量給賞勞與邊軍一體收伍食糧不願者仍照舊例施行一分地方以理邊

也看得二司官員巡守必須地方便利方可責成今關西河西二道既地里遠近懸絕難于遍巡則一方庶務何以督理而貪官污吏安知警懼金洪所奏亦爲有見合無仍行陝西巡撫再行參酌奏內事理如果前項所定地方均停從宜更改行令二司官員遵守施行一慰死事以勸邊也查得孔壩溝死事官軍近該總制秦紘具奏本部議擬具題節該奉聖旨是朱鼎妙齡武臣許慶湯璽各贈官二級仍查他子孫照例襲陞其餘陣亡官軍便著查明來說定奪欽此欽遵通行去後及又查

得本部題准事例凡夜不收公差人役被敵殺死者賞銀五兩擄去者亦賞銀二兩以恤其家今本官又奏前因緣各查有前項題行事理難再別議合咨都察院轉行本官將前項奏行陣亡官軍事情作急勘報及今後有公差夜不收被敵殺擄者照例具奏施行一分賠補以恤邊也查得官軍騎操馬匹除追敵燒荒等項公差倒死免追其餘槽下倒死告相明白官軍朋合出銀馬主出備椿頭官爲通融買補此係奏行事例其朋台之例每年終止令六箇月按月每月都指揮出銀一錢千

百戶鎮撫出銀七分旗軍出銀五分椿頭之例倒死馬主都指揮出銀三兩指揮出銀二兩五錢千百戶鎮撫出銀二兩旗軍出銀一兩五錢走失者各加銀五錢今金洪因見各邊騎操馬匹追補不均要得查究倒死緣由分別免追一節最爲有見既查有前例相應通行遵守合無本部移咨各該巡撫及咨都察院轉行本官各仰所屬衛所官軍務要各將騎操馬匹用心愛惜餵養臆壯以聽調用內有因公追敵等項致死者免其賠補官給馬匹醫治不效者卽係槽下倒死之數照例追徵

椿頭銀兩貼補朋合銀兩買補其有爲因私事走死及諸般作踐倒死者查勘的實卽追好馬一匹還官或追銀十兩在官買馬各邊一體通行不許偏執致有彼此不同則馬政不致廢弛矣 議奏得旨准議

請立記注史官疏

弘治十七年

儲 懽

臣伏見陛下卽位以來屢垂清問召見大臣至于今歲舉行尤數或究典禮或詢治道或綜核庶職或制御四方邇者又親御午門讞審大獄盛德偉績垂耀無窮非臣之愚所能殫述臣聞堯舜之德文武之政所以布天

下傳後世者賴有典謨方策之存使非史官當時紀載則後代君臣何所誦法故古者設立史官左史記言右史記動職綦重也臣備員班行每覩陛下宣召羣臣奏對多係帷幄之語造膝之言近臣不得聽聞史臣何由紀錄臣竊惜之夫前代史官追述往昔尙且網羅散失摭拾傳聞以成不刊之典豈及今日宸衷睿想之所形聖謨神斷之所著明並日月炳若丹青顯然可書足以傳信乎且儒學里塾之士門生弟子更相問難猶有實錄年譜以備遺亡陛下傳精一之學臨埏紘之衆勵精

圖治益大有爲自此延訪日廣政事日新蓋有不可勝書者顧乃無所纂記以貽來世非缺典歟失今不圖誠恐歲月緜遠耆舊彫謝或遺失莫存或傳聞各異事蹟無以究其始末日月無以攷其先後雖悔之亦無及已竊攷本朝史職似與前代稍異臣愚欲乞陛下特敕在廷臣僚先後曾蒙召問者備錄聖旨奏對之詞具本進覽宣付史館如事涉機密不宜宣露者御覽訖仍乞封識付之謹密之臣藏諸深嚴之地所謂金匱石室者以俟將來庶聖君言動舉止無所遺羣臣論說亦以附見

洪武年間嘗有起居注陛下儻採臣言而行之遵祖宗之典貽萬世之謀臣不勝至願 疏入帝從之

豫處邊儲以備供餉疏

弘治十八年

楊一清

臣竊惟圖事于平時者易應變于倉卒者難先年陝西因不曾先事儲蓄及至敵人入套動調馬軍奏開課鹽若干萬引運送官銀若干萬兩舉行納銀冠帶等項事例敵尋出套師旅旣罷倉庫一空徒爲乘時射利者之地而民遭餽運轉輸之苦逮今比屋蕭然生理未復向使敵人不退兵連禍結內變將作何以爲計言之可爲

寒心邊報稍息上下相安遂謂無事儲蓄之策廢而不講頃者敵復入套烽火絡繹計所儲在在不足相顧駭愕仰給朝廷幸而敵人悔禍遠遁設或潛伏河套經年不出乘秋大舉長驅深入縱然不惜府庫之財以充供軍之費而地方所出有限倉卒亦難辦給此皆失于先事儲蓄之過也且如每草一束平時價不過二三分遇急收買費至七八分一錢而無措每糧一石平時價不過五六錢遇急轉輸費至二三兩而不足此理甚明人豈不知其因仍玩愒良亦有故今之士大夫任耳不任

目惡聞人善而樂談人之過失寧倉卒而勞費人無非議平時招糴增糧增草則羣而譁之以爲多事甚則疑其因以爲利用是凡厥有位卑者苟且自保幸免罪責尊者因循悠忽坐待陞遷有能實心爲公家任事者寡矣臣竊恐議者因見延寧小捷地方稍靖遂置邊儲于度外萬一有警又將貽後時之悔深慮卻顧不得不極言之伏望皇上俯念陝西關中重地邊儲缺乏太甚所宜急爲豫處乞敕部于陝西關中兩淮等運司常股存積等課鹽百餘萬引及今招商于夏秋收成之後糴買

糧料草束查撥固靖蘭州環慶各該邊堡屯駐軍馬缺乏去處上納仍要斟酌敵情緩急如果敵人在套盡收本色量寬斗頭使人樂趨不許嫌避誤事若非緊急敵情又當酌量年歲豐歉年豐有收則廣爲招糴不厭其多如歲歉收薄則量收一半本色以防目前之急仍存一半銀兩以爲來歲之圖免以不貲之財坐爲營利者所得其他充實邊儲事宜擇其有益地方無損治體者爲之大要使邊倉各有二三年之儲則遇警不至于告乏布政司常有數十萬兩之積則臨期尚可以有爲此

在巡撫督同布政司官通融處置次第舉行居常勿習于玩臨事勿傷于急則事集而人不及知不必取旦夕之盈爲張駭之舉重費其力以資勢利此愚臣爲兵事謀爲民事謀爲治體謀之惓惓也 疏入得旨是著各官上緊趨時整理務要處置停當邊儲充實無致臨期缺乏

經理要害邊防疏

正德元年

楊一清

臣竊見陝西各邊延綏城堡據險寧夏甘肅河山阻隔敵人侵犯止在本境爲患猶淺惟寧夏花馬池至靈州

一帶地里寬漫城稀堡疎兵力單弱一或失守敵衆拆牆而入其利害不在寧夏而在腹裏必將犯我環慶侵我固原深入我平鳳臨鞏等府州縣倘兵連禍結內變或因之而作根本動搖誠非細故成化初年敵人在套彼時未有邊牆恣肆出入後因巡撫寧夏都御史徐廷章等奏修邊牆二百餘里開濬溝塹于延綏又巡撫延綏都御史余子俊修濬完固敵人知不能犯不復入套者二十餘年世平人玩邊備稍疎牆旣日薄溝又日淺弘治十四年敵人由花馬池入犯內郡戕敗我士卒魚

肉我生民敵人得志始蔑我邊牆爲不足畏連年擁衆拆入我軍動輒失利先是寧夏鎮巡等官太監張佃總兵官郭鈞都御史王珣等節經議奏請將舊邊牆幫築高厚邊塹挑濬深濶又該提督軍務都御史史琳等建言請于花馬池韋州設立營衛摘撥腹裏官軍防守兵部奏行總制尙書秦紘勘處本官泥于所見止添修四五小堡及弘治十七十八年冬敵復大舉自花馬池清水營城堡攻陷花馬池官軍殘害上廬宵旰之憂特命愚臣整飭經理臣雖闇劣歷官陝西邊事頗常究心但

腹裏頻年旱荒倉廩空虛饋餉不繼敵人動號數萬倏聚忽散出沒不常未至而廣徵士馬則徒費芻糧旣至而調兵應援則緩不及事縱使大兵旣集務速則彼或不來持久則我師先老恐終無以伐其深入之謀阻其方張之勢臣歷延綏一帶邊牆城堡墩臺逐一閱視及將原勘議事情會同陝西鎮巡諸臣廣集衆思兼收羣策參酌損益其大要有四修增牆塹以固邊防增設衛所以壯邊兵經理寧夏以安內附整飭韋州以遏外侵當務之急莫先于此但修邊一節地方財匱民勞興此

大役必多異議然利害有重輕關繫有大小土木之害較之搶殺爲小動搖之患比之勞費爲大大事可成則小費不足計遠效可圖則近怨不足恤且今河套卽古朔方地唐張仁愿攝御史大夫代朔方總管築三受降城置烽堠千八百所自是突厥不敢踰山牧馬歲減鎮兵數萬夫古之舉大事者未嘗不一勞而永佚受降據三面之險當千里之敵國初舍受降而衛東勝已失一面之險後又撤東勝以就延綏則以一面之地遮千餘里之衝遂使河套沃壤棄爲敵巢深山大川勢顧在彼

而寧夏外險反在河南此陝西之患所以相尋而莫之解也茲欲復守東勝因河爲固東接大同西接寧夏使河套方千里之地歸我耕牧開屯田數百萬用省內郡轉輸斯爲上策及今將延綏寧夏一帶邊防設法整飭蒐選守軍策勵將士修車馬備器械儲糗糧明斥堠今冬敵人若復侵犯仰仗神武之威謹當督率諸將恭行天罰雪恥除殘臣之志也臣何敢幸一時之安而委患于他人哉 疏入帝從之

豫處兵機疏

正德元年

楊一清

臣愚以爲敵人自弘治十三年延綏大同官軍失利之後橫行無忌弘治十四年深入陝西腹裏殘害生靈動以萬計弘治十八年宣大遊兵全軍覆沒又河凍之後連年窺伺陝西旣未遭挫必無懲戒今冬踏冰入套之舉難保必無旣入河套必不安靜臣方部署將士振揚威武已將沿邊直抵腹裏分爲四路布置主客官軍相機邀截但兵少敵多未免一以當十出奇制變事不得已臣愚以今冬深河凍敵果入套宜徵調宣大二鎮遊奇官兵于延綏中東二路住劄並聽張安節制若止在

套住牧未嘗擁衆內侵則嚴兵自守決不輕敵自起邊釁如仍前深入固慶等處搶掠行令延綏鎮巡官選人分投出境哨探敵營遠近衆少會合主客官兵豫先分布逼近敵營城堡如在一二百里之間有機可乘則原擬沿邊中路邀截之兵依舊不動以延綏東路參將時源所領本鎮三路軍馬與臣近日挑選先鋒奇兵官軍三千名以爲馬戰總兵官張安領本鎮選定頭撥等官軍三千名次之以爲中軍大同遊奇兵馬左右二哨及宣府遊奇兵又次之以爲外援太監劉保都御史文貴

領本鎮兵馬並本隊官軍于牆外二三十里列車爲陣
分布得宜晝伏夜行各相去二三十里擇形勢利便之
地爲營以待務使聲勢連絡前後相望我兵旣近敵壘
奮勇疾進衝其腹心敵旣潰亂舍其羸老而戮其壯健
奪其鎧馬而縱其牛羊大同之兵堅整嚴備不許貪利
輕動前鋒勝負未決恐無聲援必待其旣回以爲羽翼
敵若糾衆尚集我軍張安合大同之兵專爲殿後如此
布置較之先年出境分布疎遠孤兵無繼訖難成功者
不同敵人千里趨利日久疲弊聞我傾其巢穴必自遁

歸我腹裏之兵躡之中路之兵劫之沿邊之兵又夾而
邀之敵戀巢之心旣勝欲戰之志不堅必然潰敗安邊
制敵之計莫快于此 疏入得旨是闔外之寄卿等所
專出奇制勝事難遙度務要計出萬全以除邊患無致
疎虞

陳政令十失疏

正德元年

李東陽

臣伏念陛下嗣位之初臣等輔導啓沃多見施行少伸
報稱近數月來往往旨從中出畧不預聞有所擬議率
多改易詔書不信政令失中姑以其重者言之商人譚

景清等附託皇親奏討殘鹽既不肯奉詔還官又不肯領回原價挾制朝廷搖撼官府沮陛下之美政累母后之盛德論其情罪死有餘辜且皇親之家既已辭退家人引目此商人者已不相干而乃曲爲庇護寧使帑藏空虛邊餉匱乏而不之顧此政令之失一也大同隨征所開衝鋒破敵三次當先二項揆之舊制俱不當擢況紀功官原開按狀不係對陣侍郎等官勘得功無顯迹又無明證名字不對多寡不一而乃循近年弊政欲遷數百冗員以官法爲人情視爵祿如糞土此政令之失

二也內府冗員奉旨裁節僉書守門及分守守備等官減革者百無一二而南海子淨身人又選八十餘名非惟傷財害民抑且敗壞風俗至于蟒龍玉帶濫賞無算大壞名器尤不可言此政令之失三也御用監書象缺人吏部奉旨攷選乃令革退人役通送本監攷校優劣是不信銓衡之任而信寵倖之臣況該部查出革退之人俱係夤緣傳奉詔下裁革者曾不幾時遽開此例則匠官術士倣倣成風以邪路爲當行視詔書爲故紙此政令之失四也他如皇莊田土已令巡撫官查數又復

差官踏勘取者未回差者繼出帶領人役騷擾地方京畿小民何以堪之此政令之失五也駕帖出外收人累經各衙門論奏恐生詐僞近因皇親家人奏懇畿民侵佔田土輒爲給帖提解來京鎮撫司訊問情節俱與原奏不同未免仍解本處官司問理牽連負累冤苦無伸此政令之失六也韋興等人蠱惑先朝盜空府庫一則資緣分守累劾不退一則奏請追究止令取回遷延至今未正典刑此政令之失七也各營執事官軍及內府軍匠俱經奏准查赴團營及各衙門乞留仍復照舊廢

營伍之籍供私門之用此政令之失八也內承運庫銀兩支銷累數百萬內府支用不給印票該庫內官自請查算竟爾不行司鑰庫銅錢該部累奏支用展轉推延至今未發此政令之失九也饒州瓷器奉詔蠲免二年又令起運來用此政令之失十也似此之類未易悉舉臣等或傳聞坐視無可奈何或封還執奏不能終止其爲失職實所難辭追思先帝寄託之言仰念陛下委任之意若涓埃之力少有所裨犬馬有知猶當報德豈忍于主少國疑四方多事之時潔身去位自求便安但忠

不足以格君才不足以濟世向者所陳奉有聖諭云朕便處治至今未見施行又奉聖諭云待斟酌施行是必言無可采乃使之照舊輔導亦不過仍前失職而已乞特賜罷歸亟選非常之才俾任難爲之事庶可以上回天變下慰人心承先帝付託之隆保祖宗基業之重矣臣不勝懇迫激切之至 疏入得旨所言事件著各衙門查奏定奪卿等盡心職務以副倚任該衙門知道

御選明臣奏議卷十一

御選明臣奏議卷十二

裁冗食節冗費奏 正德元年

韓文

臣等欽遵查理京庫銀兩以歲入言之夏稅共該五萬五百餘兩秋糧九十四萬四千八百餘兩馬草二十三萬七千餘兩鹽課折銀二十餘萬兩雲南開辦三萬餘兩通計各項實該一百四十萬九百餘兩以歲用言之宣府年例五萬兩大同五萬兩遼東一十五萬兩延綏三萬兩甘肅寧夏共六萬兩給散京衛官軍俸糧共三十三萬五千餘兩內府成造寶玩等項其數不得預知

大約并前折俸銀不下五六十萬餘兩通計各項實該一百餘萬兩其間支剩馬草等銀節該本部題准俱送太倉收候以備邊方緊急支用不許別項支銷故太倉之積多者三四百餘萬少亦不下二百餘萬夫以近年以來前項額辦銀兩或災傷減免或小民拖欠或詔旨蠲免歲入既虧于原額而歲用乃過于常數姑以近日言之宣府年例外運送過六十一萬餘兩大同年例外運送過七十七萬餘兩陝西各邊年例外運送過四十萬餘兩遼東豫送過三十二萬四千餘兩蓋邊方緊急

糧草缺乏鎮巡等官例外奏討之數又征進京軍給賞過六萬九千六百餘兩在京官軍人等共用過銀七十二萬四千二百六十餘兩及各邊官軍共六十九萬三千三百二十兩又陝西賑濟銀二十萬兩密雲紫荆居庸倒馬關等處召買糧草銀共一十二萬八千餘兩買金進送內府二萬六千五百餘兩迄今舉大婚禮等項支用一歲支間實用過四百餘萬兩通前年例將及五百餘萬兩是舊例歲用之外又加至四倍餘矣帑藏何由而不空財用何由而不竭哉臣等竊聞滄海不能實

御選明自奏言 卷三 二 吳舒帷校
漏卮鄧木不能供野火其勢使然也今值海內虛耗之
日百姓愁苦之時加以兵荒之相仍供億之浩繁不經
之費日甚于前奢靡之習漸長于昔而欲應變制用倉
卒取盈豈不難哉臣等叨備任使受恩深重苟有分寸
之補敢辭犬馬之勞但晝維夜籌計無所出將欲少徇
乎人情又恐致傷于國體將欲取給于目前又恐貽患
于將來或益少而損多或害重而利微輾轉憂思如芒
負背臣等所以不敢輕爲之議者蓋以此也竊嘗上觀
往古下迄唐宋遠揆先王之制近觀祖宗之法莫不以

財貨量入爲節以勤儉愛惜爲本以侈靡妄費爲戒蓋
天之生財有限而人之用物無窮若不撙節于平日何
以克濟于臨時然撙節之道要未不自君身始者伏
望陛下念天命之至重荷祖業之至大念民事之至艱
躬履儉約爲天下先乞將臣等議擬條件留神覽察斷
在必行庶乎轉嗇以爲豐伸縮以爲贏非徒濟一時之
用實以培萬年之基臣等下情不勝惓惓憂惕仰望之
至除有禁例難行及各官或另有條陳聽戶部徑自覆
奏外今將臣等會議過事件逐一開坐上請定奪一裁

革冗食查得近奉詔書并各衙門奏行事理已將冗濫官員軍匠通行裁革矣但其間裁革尚有未盡者亦有已蒙裁革仍復資緣希圖照舊管事者以致冗食如舊支費不經夫當此匱乏之時而不亟為裁革變通之計何以裕民生而足國用乞敕下禮部將光祿寺遞年科徵雞鵝等項廚料通行查革但係不急之用盡行裁省一崇尚節儉臣等竊觀自古人君莫不以勤儉興國奢靡壞政漢文帝躬衣弋綈集阜囊為帷惜中人之產罷露臺之費以致海內殷富是其明效大驗也邇者皇上

體念民窮財竭風俗僭侈特敕文武百官不得僭用玄黃紫三色及軍民下賤等不得衣羅段紵絲三品以下暑月不得執扇用蓋中外臣民間之莫不懽欣稱頌以為陛下躬行儉約其效必肇于此矣蓋人君一身實為萬化之本君能自行則不令而行君不能自行則雖令不從臣等伏望皇上念祖宗創業之難憂國用匱乏之極守恭履儉崇尚節約凡一銀一錢之微皆為小民之脂膏一衣一帛之細皆係庫藏之官物省無益之工罷不急之用仍乞敕司禮監御用等監凡百上用輿馬服

飾器用玩好屏去淫巧務從樸素使度數不得增于前而法制可永垂于後再乞敕光祿寺查勘內外近侍官員日逐費用桌席酒肉等項但係濫費應該減革者一奏請節省使天下臣民仰觀聖意之所在翕然向化則儉約之風可興奢靡之俗可革而財利之用自足矣一裁革冗費仰惟祖宗之朝財賦皆有定制費出亦有常經如天下歲辦京庫銀兩共一百四十九萬歲用則僅該九十餘萬漕運糧斛共三百七十萬石歲支則僅該三百餘萬其他料豆草束絹布花絨與夫光祿寺廚

料內府顏料等項大率類此是卽所謂以十之七爲經費而儲其三以備兵荒支用者也近年以來官兵吏匠冗食日增水旱災傷逋負日甚加以土木迭興齋醮繼作勲戚貴近惠賚不貲宴樂游賞費出無算司兵柄者不計錢糧之費掌財賦者惟圖儲蓄之多姑以大者言之如內承運庫自來成造金冊只用在庫金兩近年累稱不敷索取于外戶部節次買過金一萬四千八百餘兩本庫銀兩止備軍官折俸糧等項支用自弘治十五年

軍月糧成化五年一月止該支二萬六千九百餘石弘治十五年以後則月支四萬五千餘石武驤右衛勇士月糧成化八年一月止該一千五百九十餘石弘治十五年以後則月支五千餘石軍士冬衣布疋成化十三年止該一十九萬六千八百餘疋弘治十四年以後則支二十三萬餘疋內承運庫絹疋弘治十四年以前歲支二十七萬八千二百八十七疋以後年分增至三十一萬餘疋又如光祿寺先年會派廚料等項俱勾歲用近年累奏不敷借過太倉銀十萬餘兩先年各邊除原

派料草之外歲該送銀四十八萬兩自弘治十三年山陝用兵及近日宣大二鎮邊境爲患解過銀八百餘萬兩又如京營人馬舊無聽征而今有聽征支給草料之例近京關隘舊無防守而今新設防守官軍之名調度愈繁則供節愈急國用愈竭則上下愈困爲今之計若不急爲裁節年復一年噬臍何及合無敕令戶部約祖宗以來歲賦之數查正統以前歲用之則酌爲中制永示遵守今後非成造上用件及王府寶冊等項不得用金非聖旦千秋等重事不得用銀管事人員悉遵舊制

不得纖毫浪費及因事花銷并指稱齋醮賞賜等項名色朦朧奏討該部每年仍扣算進送銀兩不過五十萬兩之數其在京官兵匠役但係傳陞乞陞收充等項各該衙門作急查奏會奉旨裁革者悉從原旨存留者照例支與俸糧一半及今後光祿寺供應悉從裁減務復祖宗之舊制成清儉之美俗至若軍旅重事雖兵部所司其間事干錢糧多係先行具奏然後開咨戶部知會撥辦事體實有未便況國計盈縮事例應否一時計處未必皆當今後凡調度人馬招募軍士等項係干錢糧

者俱要會同戶部計議而行此外凡有冗費可節者聽戶部逐一查出奏請施行 奏入有旨這本內所開事件都准議行

請辨忠佞疏

正德元年

劉玉

臣伏惟朝廷大事凡治忽安危之所繫為臣子者當効忠陳諫豈可自諉泛遠甘為容默之理臣待罪近畿竊聞陛下近日頗聽信太監劉瑾等多事逸遊又聞內閣大學士劉健謝遷俱以諫不得行致仕而去伏思劉瑾等佞倖小臣凡其巧為戲弄不過博陛下之一笑而已

而不知耗神氣惑聰明妨政理爲損多矣至二臣者先帝所簡以輔聖躬者也顧欲屏而去之此其事甚左陛下弗察顧不忍于彼而忍于此徇逸遊之樂棄輔導之臣違先帝付託之言遂瑾等恣肆之計此誠天理人欲存亡之幾國體治亂安危之繫臣叨言職此而不言無復可言者矣孟子曰逢君之惡其罪大若瑾等之導逸遊所謂逢君也又曰畜君者好君也若劉健謝遷之止佞倖所謂畜君也畜君者用則聖德日茂逢君者進則國事日隳不可不謹也抑臣尤有深慮者陛下春秋方

富總理萬幾輔導大臣旣皆引去內侍老成者又多退閒則論議安所顧問燕閒誰與居處乎必將逸遊愈數佞倖愈親忠益之事不聞讒諂之言日進如是而政柄不移政體不紊未之有也況今天下民窮財盡所在空虛武備不修寇盜日起以陛下卽位之初而天下之疲敝如此正宜恐懼修省克己從人乃更厭老成而喜私暱耽逸遊而忽政理是猶馬旣逸而棄其轡車將傾而舍其御豈不殆哉且天下大器常以衆君子持之而不足一小人壞之而有餘今二臣旣去則君子之勢益衰

羣佞不除則小人之黨益肆此尤臣所大懼恨不叩首
 丹陛以回陛下之聽也伏望陛下體天人歸與之重念
 祖宗創造之艱謹治忽安危之幾察忠佞是非之實將
 瑾等執下法司明正典刑勉留大學士劉健謝遷仍責
 以輔導之任其司禮近侍悉簡老成之人禁止逸遊完
 養神氣清心講學以興理治如此則海宇乂安皇圖永
 固陛下壽同乎軒義名齊乎堯舜誠宗社萬年無疆之
 休豈徒一事之美一時之幸而已哉 疏入帝不納

論誅太監李興伐木石疏 正德元年 周 璽

臣謹題為誅極惡以謝祖宗安陵寢以蕃聖嗣事去歲
 先帝上賓陛下特以陵寢事重簡命內官監太監李興
 新寧伯譚祐工部左侍郎李璲提督營造軍夫匠役出
 于營衛百物價值供于部廠為李興者當追思先帝寵
 遇之隆仰體陛下委託之重竭力殫心以祇承厥事可
 也奈何縱溝壑之欲肆盜賊之謀故將工部坐派柴薪
 折價私貯豫為侵剋之計而又縱使太監王瑞等指麾
 下人罔顧國禁砍伐禁山樹木數萬餘株掘取禁山石
 片數百餘丈山林為之赭赤坑坎不計深闊龍脉為之

損傷秀氣爲之虧折驚犯陵寢得罪宗廟此誠天地所不容神人所共怒者也陛下赫然震怒差官勘實仍敕法司會問明白具招覆奏臣等謂陛下必念祖宗之體魄震驚痛先帝之神靈未妥大彰天討亟行顯戮而乃因循未決旬日之後方欽奉聖旨李興王瑞饒死差人押發去南京孝陵神宮監充淨軍種菜譚祐李璣俱准擬欽此聖旨一下人心驚疑道路藉藉謂陛下私近習之恩忘祖宗之舊將必有左右曲爲回護而惑聖聰者且謂近歲南京守備太監蔣忠于孝陵南二十餘里山

平開一路私便行走事發先帝以孝陵案山有傷龍脉恐致宗室有損遂擬于死當時豈無權倖貴近爲之營救者先帝不爲所惑聖斷不移卒死于獄今李興等所犯罪惡深重陛下縱自寬假獨不爲祖宗念爲子孫慮耶漢時有盜高廟玉杯者文帝欲置之族而張釋之固請棄市且曰盜玉杯者族有取長陵一抔土者何以加法乎蓋以盜杯罪止棄市而族誅之法宜加于盜取陵土者也釋之號稱執法豈欺文帝者李興等伐掘陵寢木石以十萬數比之抔土萬一不同使在漢時寧能免

族誅之法卽民間葬地亦欲土脉膏潤草木茂盛又必封植毋容樵牧蓋以祖宗體魄所藏祖宗安則子孫亦安故禮載擇地之文律嚴發塚之禁庶民墳墓且慎重如此況陛下以四海爲家萬方爲土名山天設用爲祖宗列聖衣冠之藏固將福祚陛下以爲千萬億年之計也而李興等掘伐之慘至于如彼是雖剝屍萬段尙未足謝神人之怒而仰慰祖宗之靈陛下不卽加誅止令各充淨軍罪重罰輕誤亦甚矣臣等又惟李興荷累朝之任使憑先帝之寵眷大興營造剝軍削民累貲萬萬

而貪欲不滿氣焰薰天而炙手可熱貴戚權倖多相交納左右近習皆其黨羽凡有爲回護解釋之言者是畏其威憑其勢而利其財賄者也何爲而輕聽之哉再照新寧伯譚祐侍郎李璲身爲大臣忘君黨惡跡其情狀厥罪惟均萬無可貸而法司止擬奏事不實徒罪臣謂李興譚祐李璲職銜並列于敕諭坐次同列于公衙文案同署號令同發事無大小罔不通知而謂照料不及皆由李興三尺之童亦不可誑其巡山官軍兩次捉獲擅伐活樹軍人到官李興不加禁治惟時二人果醉夢

而不知覺耶抑病篤而不知省耶卽此觀之二人擬罪當不在李興下法司舍其重罪擬以輕條是亦回護二人而上欺朝廷者也臣等伏願奮乾剛之斷亟天討之誅收回成命將李興王瑞戮于市曹告之宗廟譚祐李璲縱不加誅亦宜削爵放黜以爲大臣欺罔之戒亦乞且賜裁處仍敕工部並欽天監選取精通地理者前去相視掘伐之處可栽則栽可培則培可填補者填補務使龍脉不虧秀氣如舊上以安祖宗列聖之靈下以壽聖子神孫萬萬世之傳臣等不勝爲國拳拳願望之至

疏入帝不納

論正失罰疏

正德元年

周璽

臣謹題爲再申忠懇以正失罰事臣等竊謂臣之事君猶子之事父也父有失子三諫不聽則號泣而隨之冀其感悟必改而後已然則人君失罰其所當罰而爲之臣者不能盡力救正而遽已焉亦豈人臣事君不欺而犯之義哉此臣等于李興之事不敢以煩瀆爲嫌必欲再三爲陛下陳之冀其俯納也夫李興王瑞砍伐皇陵樹木數萬株而赭其山鑿取禁山石片數百丈而坑其

地譚祐李璉知情故縱坐視不救驚動陵寢獲罪祖宗
陛下悉從輕典不加誅竄臣等已經論列法司亦曾執
奏欲陛下仍置李興王瑞于法而譚祐李璉重加貶黜
以爲人臣不忠之戒陛下已降旨寢罷矣及譚祐李璉
自知公論難容陳辭引退陛下仍復降旨慰留之臣等
聞命益加疑懼以爲陛下聰明仁孝敬天法祖而斷此
大獄竊恐未厭衆心難止羣議也臣等節該伏覩英宗
皇帝聖旨于天壽山偷砍樹木其該管軍衛有司人等
坐視不行鈐束論罪都該處死及憲宗皇帝聖旨于鳳

陽等處應禁山場伐樹取石正犯處死此蓋列聖防微
杜漸之深意以爲法令不嚴人必輕犯以震驚神靈損
傷龍脉爲害不小故孝宗皇帝復收之于例與律並行
亦欲聖子神孫萬世繩繩也今興等所盜非一木一石
之比而其情罪豈直坐視不救之倫陛下皆宥其死則
自是而後愚民有取禁山一木一石者將誅之乎則非
官府一體之謂將欲宥之乎則列聖之禁例自此而不
行此李興王瑞之當照例處死無疑也陛下何爲饒其
死而止令充淨軍乎此臣等所未喻也譚祐李璉旣奉

敕一同提督則與等侵盜之錢糧工部所出入也某何爲而不查攷伐取木石之軍士總兵所管轄也某何爲而不鈐束今各知情故縱黨惡蔽奸正合坐視不行鈐束之例且巡山人等坐視不禁罪猶處死提督大臣知情故縱法安可容況其招詞旣曰譚祐李璡明知工部自有應用木柴及砍伐禁山樹木例重不合依阿不行勸阻禁約是其情罪止下李興一等耳興等旣當重治而譚祐李璡乃偃然復處大僚之列豈公刑法之道乎故臣等以祐璡之罪任其事而不知則爲失職知其情

而不舉則爲奸邪豈有奸邪失職之人而復可以居大臣之位乎此譚祐李璡之當罷爵奪職無疑也陛下何爲薄其責而不竄黜乎亦臣等所未喻也昔漢文帝時有盜高廟玉杯者廷尉請棄市帝怒曰非所以恭承宗廟也唐高宗時有誤斧昭陵一柏者而當時坐免官帝怒曰是使我爲不孝子必誅之今興等之罪視之盜玉杯傷一柏者相去萬萬也陛下皆從輕宥是陛下以舜文之孝而敬奉祖宗之心反出于漢唐二君之下乎臣等竊爲陛下惜也夫陵寢者列聖衣冠之藏禁例者列

聖法令之寓陛下繼列聖之大業而廢列聖之法令列
聖以四海之廣付陛下而陛下不能庇其數十里之山
陵使播之天下傳之後世豈不爲聖德累乎臣等備員
言路補過拾遺乃其分也彈劾奸邪乃其職也以聖明
之朝而有此奸邪以陛下之聖而有此失罰臣等或緘
默不言或言之不行而遽止焉則祖宗在天之靈謂臣
等爲有罪天下後世謂臣等爲失職此臣等所以不避
斧鉞之誅以盡芻蕘之說伏乞陛下念祖宗之當重思
法令之當守俯從法司之議割恩正法將李興王瑞仍

行處死而譚祐李璲亟加貶黜庶情不蔽于左右而法
得行于貴近列聖陵寢自此而奠安國家命脉自此而
益永宗廟幸甚社稷幸甚天下亦幸甚 疏入帝不納

論內侍劉瑾等奸邪疏

正德元年

周璽

臣謹題爲糾治羣邪以正朝綱以隆聖治事臣等猥以
凡庸待罪言路靜思身計非不知緘默足以自容多言
適以取禍而受國委寄食君廩祿事有當言而不言與
事有可慮而不慮將來大壞極弊不可救藥彼羣奸者
剝屍焚骨固無辭矣然而迷國誤上臣等之罪亦復何

道是以不避批鱗之諱僭伸苦口之言惟陛下曲赦其愚而開懷俯納焉臣竊見陛下臨御以來善政不聞國事大變凡古者縱欲敗度之事踵而不疑大臣瞻顧而不言小官守位而不發推原禍根蓋左右羣奸惑亂之所致也今中外切齒于數人者而九重獨未覺悟臣等不惜爲陛下言之竊照司禮等監太監劉瑾馬永成谷大用魏彬丘聚張永傅亨羅祥等或係先朝舊人或經春宮任使遭際已極寵倖實深當皇上嗣統之初正國家多事之日爲各官者自合小心恭謹因事納忠以救

不逮庶幾上報先帝光輔新政何乃各恃其技能工巧言辭捷給每早退朝輒引聖駕或泛海子或遊南城或縱騎射或放鷹犬或盛排筵席而酣飲或搬做雜劇以縱觀或進新聲以逞奇或獻果核以乞賞凡所以蠱惑心志變移性習者蓋無所不用其計近日來多以耳目玩好爲娛而經史不暇究以宴安沈湎爲事而政務不及理或起居無常或動息失養或賞以喜僭而內帑財帛用如泥沙或恩由濫與而蟒龍玉帶施及童稚或成命已行而復改或詔書已出而竟違貴倖傾朝奸諛得

志老成擯而不用公道鬱而不行聰明則日蔽于上弊政則日滋于下目前凡百無一當人心而協輿論者陛下試思此等舉措果斷自聖心者耶抑此數人者誤賺而成此也痛哭流涕賈誼尚施于漢文之世而今日事勢特甚于彼奈之何而忍緘默耶且如四十萬之銀庫藏已竭假婚禮爲由必欲取盈五七歲之童乳臭未除以勇士爲名必欲收用織造停免矣而又啓織造傳奉查革矣而又開傳奉鹽法方差官整理而崔杲又奉帶鹽引地土方差官清查而張永又奏討地土凡朝廷之

大計軍旅之重事國家所恃以爲安危強弱者此曹皆縱情恣意撓亂阻敗而不恤尚安顧其他哉臺諫雖交章抗論該部雖再三執奏從者無一二不從者恒八九甚則指摘差訛隨加責罰臣等以干言而不足彼以一言而有餘則是壞祖宗之家法傷廟堂之治化累陛下之初政釀天下之禍亂非此數人將誰諉哉只今各處旱乾水溢民窮盜起財用困于內盜賊肆于外今歲孳彗飛流明年日食歲首凡此皆災異之大聖心所當儆畏者也其尤可憂者往年雷震奉天殿鴟吻未幾而有

土木之變今夏雷擊奉天殿鴟吻其應將何如哉前事
不忘後事之師陛下固欲修省祇行祭告是徒事虛文
罔修實德實自誣耳何足回天變而安人心也哉夫天
變于上而不悟民怨于下而不知此古昔有國者之所
深忌今日之勢不幸類此陛下豈可盡謂天下無事日
與此輩施施然安于不職也哉外議洶洶萬口一談皆
此數人者壞陛下繼述之孝而引之于有過之內他日
根蒂已牢禍階已成則事無及矣伏望念祖宗艱難之
業察愚臣犬馬之忠乞敕錦衣衛將此數人拏送法司

明正典刑或肆諸市朝或送之遠裔告謝天下然後治
臣多言之罪以謝此曹仍乞陛下自今講學親賢修身
遠佞早朝晏罷節用裕民各項弊政憫念時艱悉從該
部議處俯賜俞允如此則國典自正國是自明天人之
憤泄陰陽之氣和災沴自消瑞應自至天下自太平矣
臣不勝迫切忠懇之至 疏入帝不納

劾劉瑾疏

正德元年

蔣欽

臣竊思劉瑾小豎耳陛下親以腹心倚以耳目待以股
肱殊不知瑾悖逆之徒蠹國之賊也忿臣等奏留二輔

抑諸權奸矯旨逮問予杖削職然臣思畎畝猶不忘君
況待命衽席目擊時弊烏忍不言昨瑾要素天下三司
官賄人千金甚有至五千金者不與則貶斥與之則遷
擢通國皆寒心而陛下獨用之于左右是不知左右有
賊而以賊爲腹心也給事中劉漣指陛下闇于用人昏
于行事而瑾削其秩撻辱之矯旨禁諸言官無得妄生
議論不言則失于坐視言之則虐以非法通國皆寒心
而陛下獨用之于前後是不知前後有賊而以賊爲耳
目股肱也一賊弄權萬民失望愁嘆之聲動徹天地陛

下顧懵然不聞縱之使壞天下事亂祖宗法陛下尚何
以自立乎幸聽臣言急誅瑾以謝天下然後殺臣以謝
瑾使朝廷一正萬邪不能入君心一正萬欲不能侵臣
之願也今日之國家乃祖宗之國家也陛下苟重祖宗
之國家乞卽臣所奏垂聽察焉 疏入杖三十繫獄

再劾劉瑾疏

正德元年

蔣欽

臣與賊瑾勢不兩立賊瑾蓄惡已非一朝乘間起釁乃
其本志陛下日與嬉遊茫不知悟內外臣庶凜如冰淵
臣昨再疏受杖血肉淋漓伏枕獄中終難自默願借上

方劔斬之朱雲何人臣肯少讓陛下試將臣較瑾瑾忠乎臣忠乎忠與不忠天下皆知之陛下亦洞然知之何仇于臣而信任此逆賊耶臣骨肉都銷涕泗交作七十二歲老父不顧養矣臣死何足惜但陛下覆國喪家之禍起于旦夕是大可惜也陛下誠殺瑾梟之午門使天下知臣欽有敢諫之直陛下有誅賊之明陛下不殺此賊當先殺臣使臣得與龍逢比于同遊地下臣誠不願與此賊並生 疏入復杖三十欽遂卒于獄

劾太監馬永成等疏

正德元年

陸 崑

臣竊見自古奸臣欲擅主權必先蠱其心志如趙高勸二世嚴刑肆志以極耳目之娛和士開說武成毋自勤約宜及少壯爲樂仇士良教其黨以奢靡導君勿使親近儒生知前代興亡之故其君惑之卒皆受禍陛下嗣位以來天下顛然望治乃未幾寵幸奄寺顛覆典刑太監馬永成魏彬劉瑾傅興羅祥谷大用輩共爲蒙蔽日事宴遊上于天和災祲疊告廷臣屢諫未蒙省納若輩必謂宮中行樂何關治亂此正奸人欺君之故術也陛下廣殿細旃豈知小民窮簷蔀屋風雨之不庇錦衣玉

食豈知小民祁寒暑雨凍餒之弗堪馳騁宴樂豈知小民疾首蹙額赴訴之無路昨日雷震郊壇彗出紫微夏秋亢旱江南米價騰貴京城盜賊橫行可恣情縱欲而不一顧念乎閣部大臣受顧命之寄宜隨事匡救宏濟艱難言之不聽必伏闕死諫以悟聖意顧乃怠緩悅從異順退託自爲謀則善矣如先帝付委天下屬望何伏望側身修行亟屏永成輩以絕禍端委任大臣務學親政以還至治天下幸甚 疏入逮下詔獄杖三十除名器使將才以修戎務疏 正德二年 楊一清

臣惟三軍之命實繫于將而戰守之將其用亦各不同今之參將分疆畫地各守一隅所謂守將遇警固未嘗廢戰而其用則先于守今之遊擊隨敵聲勢往來策應所謂戰將所至固未嘗無守而其用則專于戰守將之務修車馬備器械據要害固封守明斥堠謹禁防敵至而先爲之備不必求取戰功求無所失而已若遊擊之官披歷荆榛眠宿霜露非身先士卒不足以鼓勇齊力非躬冒矢石則不能解圍潰堅雖謀勇貴乎兼濟而常以勇爲主是二者固未有不相通而目前之用則先其

所急竊見分守延綏東路右參將都指揮僉事時源性資果敢膽氣猛厲慣經戰陣驍勇著聞今分守一方雖亦未嘗廢事使當遊擊之任衝鋒破敵是其所長延綏遊擊將軍都指揮同知戴欽性資明爽才識疏通曉暢邊情熟嫻戎務今爲遊擊非無可取若居分守其所建立必有過人且人才難得用違其長雖能者無以自見隨才器使則天下無不可用之人況延綏慣戰精銳之兵東西應援必得驍將領之而神木孤山一帶營堡密邇河套敵人遇冬首先窺伺分守得人有不戰自屈之

勢乞將時源改充遊擊將軍戴欽改任分守參將此二人者易地而居各當其才戰守之寄兩有所託待其勞效顯著主副將官之基未必不由于此 疏入得旨兵部知道

劾宦官疏

正德二年

韓文

臣伏念人主以辨姦爲明人臣以犯顏爲忠故羣小之姦逼近君側勢足以危社稷亂天下伏未及發是謂禍萌故曰萌不可長臣幸待罪股肱之列值主少國疑之秋仰觀乾象俯察物議瞻前顧後心焉如割至于中夜

起嘆臨食而泣者屢矣伏思與其嘆而泣不若昧死進言即使進言以死不猶愈于緘默苟容乎此臣之志亦臣之職也臣伏覩近歲以來朝政日非號令失當秋來視朝漸晚仰窺聖容日漸清癯皆言太監馬永成谷大用張永羅祥魏彬劉瑾高鳳等置造巧偽淫蕩上心或擊毬走馬或放鷹逐犬或俳優雜劇錯陳于前或導萬乘之尊與外人交易狎暱媠褻無復禮體日游不足夜以繼之勞耗精神虧損志德遂使天道失序地氣靡寧雷異星變桃李秋華攷厥占候咸非吉徵竊緣此等細

人惟知蠱惑君上以便己行私而不思赫赫天命皇皇帝業在陛下一身今大婚雖畢儲嗣未建萬一游宴損神起居失節雖將此輩齏粉渣醢何益于事乎昔我高皇帝艱難百戰取有四海列聖繼承傳之先帝以至陛下顧命之語陛下所聞也奈何姑息羣小置之左右爲長夜之遊恣無厭之欲以累聖德乎竊觀前古闔宦誤國其禍最烈漢十常侍唐甘露之變是其明驗今馬永成等罪惡旣著若縱而不治將來無所忌憚爲患非細伏望陛下奮剛斷割私恩上告兩宮下諭百僚將馬永

成等拏送法司明正典刑以回天地之變以泄神人之憤潛消禍亂之階永保靈長之業則皇上爲守成之令主臣等亦爲太平之具臣矣事關安危情出迫切不勝戰慄俟命之至 疏入帝不納

論誅大逆疏 正德二年

周 璽

臣謹題爲誅大逆以彰天討事嘗聞挾無將之心者有誅無赦逐亂賊之黨者讐不共天竊見司禮監太監劉瑾專權擅政蠹國殃民抑且私意妄干潛謀不軌臣儻知而不言一旦逆謀果肆雖與之同科亦難追緘默之

罪矣故敢昧死上聞伏惟陛下之天下祖宗之天下陛下之臣工祖宗之臣工瑾敢擅作威福于各衙門大小官員每每尋事陷害打死科道等官一言觸犯卽行枷號充軍如薛堂王岳之死尤爲慘毒夫二三羣工糾察姦邪所以共保社稷也乃敢恣意殘蹴略無忌憚豈惟全軀保命之臣畏之如虎卽矯矯素著者亦將惕于烈燄而杜口矣指鹿之姦復見今日彼一切不法等情誰肯蹈湯火冒白刃爲陛下言耶甚至差委指揮楊玉等管事害人不時差出府司州縣訪察官員賢否所過地

方重遭擾害一時百姓如罹荼毒冤號之聲徹于遠近臣嘗奉使道經寧夏百姓遮訴至不得行所在有司不敢訶問間有一二憇憇之輩潛入其黨反假聲勢助之牙爪是專權之瑾一而附權之瑾百往往至于激變嗟嗟小民安能叩九闈見天子哉近又賁緣掌管本監印事權勢益重內外百寮一應章奏不與各官計較不與內閣相干一一抽回私宅與孫聰張文冕等捏寫旨意屢更屢變是非混淆時常分付吏兵工部陞遷先于己處允行方許奏請內有今日陞職明日黜退賄賂一通

隨卽起用夫鬻爵賣官此漢唐季主所爲而瑾敢盜弄大權至于如此天下後世謂陛下爲何如主此瑾之假勢張威負罪滔天者也近又招引術士余明余倫余子仁出入監中占候天文相面算命妄意圖度至有臣子所不忍言者蓋因見財貨充盈及勢焰張大故輒起異心臣旣知之不敢不言又訪得于本年四月密令心腹牛昭潘某等暗造衣甲牌面千有餘副弓弩五百餘張潛匿私宅夫春秋之誼家不藏甲瑾之逆謀尤爲彰著已經河南道御史蔣欽等劾之陛下不惟不問反坐之

罪果出自聖斷以爲此等欺誑耶抑瑾之矯命恣行箝
言者口耶夫大姦起于下而忠言壅于上有識者莫不
爲陛下危而陛下處之竟若此不幾養虎貽患胎變稔
禍耶臣思祖宗來豈無權姦豈無邪黨而大逆不道無
如瑾比陛下卽過欲狎昵當如宗廟社稷何臣待罪言
路素性愚戇每憤及此誓不共天故區區之心惟願陛
下擴日月之照奮雷霆之威卽將臣瑾俱下法司面相
勘問如果臣言不謬乞斬劉瑾以謝天下復斬臣首以
謝劉瑾則死之日猶生之年也祖宗幸甚天下幸甚

疏入帝不納

御選明臣奏議

卷三

吳舒帷校

御選明臣奏議卷十二

